



18. februar 2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqar-punga.

(Inatsisartuni ilaasortaq Ane Hansen, Inuit Ataqatigiit)

### **Apeqqutit:**

**1.**

**Raajartassat ukioq manna malunnaateqarluartumik apparneqarnerani sinerissami suliffissuit rajaleriffiusut iliuseqartoqangippat suliassaaleqilersussat Naalakkersuisut tungaannit qanoq iliuseqarfiginiarneqarpat?**

**2.**

**Aasianni Inuutissarsiornermut siunnersuisoqatigiit Aalisarnermut Piniarnermut Nunalerinermullu Naalakkersuisumut aggersaanera sooq ilassineqangila ?**

### **Tunggavilersuut:**

Siorna ukioq mannalugu Pingortitaleriffiup inassuteqarneratigut raajartassat malunnaateqarluartumik appartinneqarput, tamatuma kingunerisa ilagaat sinerissami suliffissuit rajalerinermik suliaqartuusut ukioq naallugu suliassaqarnissaminik nalornissuteqalernerat, taakkununga ilaavoq Aasianni suliffissuaq paasisat malillugit tunisassiarineqarsinnaasut allanik ilaneqangippata August 2015-p tungaannaanut suliassaqarnissaminik taamaallaat qulakkeerinnissimasoq. Aasianni suliffissuaq illoqarfiup uummataasa pingaernerit ilagaat, iliuseqartoqangippallu tamanna Aasianni inuutissarsiornermut kingunerlorujussuassooq, suliffeqarfiit fabrikkip pilersorneqarneranut attuumassuteqarluinnartut arlaqarmata, Amutsivik, ikummatissaarniat, pisiniarfiit, aalisartunik sulisartunillu sullissisartut il.il ilanngullutik eqqorneqartussaapput, minnerunngitsumillu suliffissuarmi sulisartut ilaqaataallu aningaasarsiornikkut eqqorneqarlunneqangaassapput tunisassiat tulaanneqarsinnaasunik allanik ilasisoqangippat.

Tamanna pinngitsoortinniarlugu Naalakkersuisut qanoq pilersaaruteqarpat. Nunap immikkoortortani qaleralinniarfiit Pingortitaleriffiup inassuteqaataat sinningaatsiarlugit pisassinneqarput, tamatumalu saniatigut Naalakkersuisumik qaaqqusinerat ilassilluarneqarluni ingerlaannartumillu illoqarfiit tamarmik orninneqarlugit tamanna ajunngeqaq, kisianni sooq illoqarfiit allat soorlu Kujataa aamma Aasiaat ajornartorsiut aggersoq pillugu ernumallutik qaaqqusinerat ilassineqangila, tamanna nammineq innuttut soqutigisat salliunneqarneratut paasisariaqarnerluni.